

MAJLIS MALAM SEPULUH TAHUN UDA
NIRWANA BALLROOM, HOTEL HILTON, KUALA LUMPUR,

25 OKTOBER 1981

Terlebih dahulu saya mengucapkan setinggi-tinggi terima kasih kepada YB Datin Paduka Rafidah Aziz, Menteri Perusahaan Awam, Pengerusi, Ahli-Ahli Jemaah dan Pengurusan UDA kerana telah sudi menjemput saya dan isteri saya ke Majlis Malam Sepuluh Tahun UDA ini.

2. Uda yang diwujudkan sepuluh tahun yang lalu merupakan salah sebuah perbadanan awam yang terpenting bagi melaksanakan Dasar Ekonomi Baru, khususnya berhubung dengan objektif penyusunan semula masyarakat di bandar-bandar. Tanggungjawab UDA ini, tidak dapat dinafikan, adalah besar dan masih banyak usaha yang perlu dibuat bagi menjamin pencapaian objektif penyusunan supaya bandar-bandar kita mencerminkan kedudukan kaum yang seimbang di Malaysia.

3. Malaysia, sebagai sebuah negara yang merdeka dan mempunyai rakyat berbilang kaum mestilah menumpukan segala usaha untuk memupuk perpaduan negara. Penyusunan semula masyarakat melalui pembangunan dan pembaharuan semula bandar-bandar dengan cara sistematik dan teratur di mana aspek-aspek sosial dan budaya diberi perhatian di samping aspek ekonomi merupakan salah satu usaha yang penting ke arah perpaduan. Penubuhan UDA, sebagaimana kita semua maklum, adalah dengan tujuan untuk menyusun semula masyarakat. Dalam hal ini, UDA bukanlah ejensi tunggal yang dipertanggungjawabkan sepenuhnya untuk mencapai matlamat ini. Pencapaian matlamat penyusunan semula masyarakat mestilah menjadi tanggungjawab semua pihak walaupun UDA memegang peranan yang utama di bandar-bandar.

4. Memandang kepada pentingnya peranan UDA dalam konteks Dasar Ekonomi Baru, usaha-usaha telah dibuat untuk menjamin supaya kegiatan-kegiatan UDA dapat dilaksanakan dengan lebih berkesan lagi. Berdasarkan kepada kajiannya, UDA telah mengambil dayausaha untuk menentukan kawasan-kawasan yang perlu diberi keutamaan khususnya dalam pelaksanaan projek-projek di bawah Rancangan Malaysia Keempat. Oleh itu di bawah Rancangan Malaysia Keempat, UDA akan menjalankan kegiatan-kegiatannya di kawasan tertentu dan akan mengkhusus kepada beberapa aktiviti sahaja. UDA akan menumpukan perhatian dan kegiatannya kepada empat belas buah bandar, iaitu Alor Star, Butterworth, Bandar Melaka, Pulau Pinang, Ipoh, Johor Bahru, Kelang, Kuantan, Kuala Lumpur, Kota

Bahru, Petaling Jaya, Seremban, Shah Alam dan Tanjong Tokong. Bandar-bandar ini telah dipilih berdasarkan kepada kriteria-kriteria tertentu yang di antara lain termasuk agihan penduduk mengikut kaum, agihan pendapatan, kemampuan dan kehendak pembeli dan lain-lain.

5. Saya sedar bahawa pihak UDA tidak akan dapat memainkan peranannya dengan berkesan tanpa sokongan dan kerjasama daripada pihak ejensi-ejensi Kerajaan yang lain, terutamanya badan-badan dan ejensi-ejensi Kerajaan Negeri. Semua badan-badan Kerajaan, sama ada di peringkat Persekutuan atau negeri mempunyai peranan yang complementary dalam pencapaian Dasar Ekonomi Baru. Kerjasama erat di antara badan-badan dan ejensi-ejensi ini mestilah wujud supaya perancangan dan pelaksanaan dapat dijalankan dengan lancar. Kerajaan memandang berat terhadap tindak-tanduk mana-mana jua pegawai yang mementingkan ejensi sendiri semata-mata sehingga terjejas Dasar Ekonomi Baru. Sifat atau sikap enggan bekerjasama atau tindakan yang menjejaskan penyelarasan tidak harus wujud di kalangan pegawai-pegawai kita di mana-mana jua. Ejensi atau jabatan bukanlah satu empire yang harus bertindak untuk menakluki semua, tetapi adalah semata-mata alat bagi mencapai matlamat nasional.

Saudara-saudari sekalian.

6. Saudara-saudara sebagai anggota dan kakitangan UDA sepatutnya berbangga dapat berkhidmat dengan UDA iaitu sebuah Perbadanan yang mempunyai peranan yang begitu penting. UDA memegang amanah Kerajaan, dan adalah menjadi harapan Kerajaan dan rakyat agar ianya dapat menjalankan tanggungjawabnya dengan berkesan dan sempurna. Sebagaimana kita semua maklum masanya cuma tinggal sepuluh tahun sahaja lagi untuk mencapai matlamat di bawah Dasar Ekonomi Baru yang ditentukan di bawah rancangan jangka panjang dua puluh tahun. Oleh itu, adalah amat penting sekali Perbadanan-perbadanan awam, termasuk UDA, menumpukan sepenuh perhatian agar matlamat-matlamat Kerajaan dapat dicapai dengan jayanya.

7. Negara kita mempunyai banyak perbadanan awam. Perbadanan-perbadanan awam yang diwujudkan mempunyai peranannya masing-masing. Ada di antaranya yang khusus menjadi alat pelaksanaan Dasar Ekonomi Baru, iaitu seperti UDA. Tetapi, sama ada sebuah perbadanan atau jabatan itu mempunyai peranan yang langsung atau tidak dari segi pencapaian Dasar Ekonomi Baru ia mestilah berkesan dalam mencapai objektif dan matlamat yang ditentukan baginya tanpa apa-apa penyelewengan dibenarkan berlaku; ia mestilah ditadbirkan dengan efisien; ia mestilah menggunakan

sumber-sumber yang ada dengan cara yang produktif; ia mesti menjamin di mana yang sesuai, supaya terdapat keuntungan. Dengan lain-lain perkataan, apa yang kita kehendaki ialah suatu pengurusan yang berkesan bagi menjamin sektor awam yang produktif. Ini mestilah menjadi panduan dan komitmen setiap pegawai sektor awam; mereka yang tidak membantu atau enggan membantu meningkatkan mutu pengurusan sektor awam tidak mempunyai tempat di dalam sektor ini.

8. Di sini patutlah juga saya ulangkan hasrat Kerajaan yang memerintah sekarang. Hasrat Kerajaan tidak lain dan tidak bukan ialah untuk menjadikan negara Malaysia sebagai sebuah negara yang maju yang dihormati oleh seluruh dunia, iaitu menuntut kemajuan kerana kemajuan boleh memberi kepada penduduk Malaysia kesejahteraan dan kemakmuran baik dari segi rohani atau pun jasmani. Untuk mencapai taraf kemajuan yang kita idami bukanlah satu perkara yang sukar. Yang dikehendaki semata-mata ialah tiap-tiap seorang daripada kita, iaitu rakyat Malaysia, menjalankan tugasnya dengan jujur dan dedikasi. Semata-mata dengan membuat kerja yang dipertanggungjawab dengan sepenuhnya akan menjadikan negara kita negara maju. Status atau jawatan yang dipegang tidak penting dalam usaha-usaha ini. Seorang budak pejabat boleh menolong menjayakan usaha pembangunan negara dengan menjalankan tugasnya dengan jujur. Begitu juga seorang pegawai tinggi atau pun seorang tokoh politik.

9. Hasil daripada usaha-usaha yang dijalankan ini akan dirasai oleh semua pihak. Negara yang maju akan menghasilkan pendapatan yang lumayan kepada semua penduduknya, termasuklah kita sendiri. Sebaliknya, sifat cuai dan malas bekerja di kalangan rakyatnya menjadi negara ini lemah dan mundur. Akibatnya hidup kita akan tertekan dan kita akan menjadi kecewa dan merana.

10. Sumber yang terpenting sekali bagi membawa kejayaan kepada negara dan diri kita sendiri ialah fikiran dan tenaga manusia yang boleh disalurkan dan digunakan secara membina. Sumber alam yang lain tidak akan membawa kejayaan tanpa usaha dan ketekunan manusia. Oleh itu rakyat Malaysia mestilah sanggup berusaha dengan gigih dan bekerja dengan keras demi menjaga maruah serta kepentingan rohani dan jasmani kita semua.

11. Kualiti pengurusan UDA bergantung kepada pegawai dan kakitangannya. Adalah menjadi harapan saya agar saudara-saudara sekalian bekerja dengan penuh berdisiplin dan memikul tanggungjawab dengan jujur dan dedikasi. Setiap seorang daripada kita di dalam perkhidmatan awam memikul tanggungjawab dan memegang amanah yang besar dan apa-apa kecuaiian atau

penyelewengan bukan sahaja merupakan pengkhianatan tetapi juga dosa.

12. Akhir kata, saya mengucapkan kepada saudara-saudara sekalian selamat menjalankan tugas dan selamat maju-jaya.

Wabillahitaufik walhidayah, wassalamu'alaikum warahmatullahi wabarakatuh.